

**Krisis Kedah: Keputusan Umum Isnin
mStar Online
Mac 4, 2012
Oleh ARIFFUDDIN ISHAK**

PETALING JAYA: PAS Pusat sudah membuat keputusan muktamad bagi menyelesaikan krisis kepimpinan pentadbiran kerajaan PAS Kedah.

Setiausaha Agung PAS, Datuk Mustafa Ali berkata, keputusan tersebut dicapai pada mesyuarat khas Jawatankuasa PAS Pusat yang berakhir kira-kira pukul 3 pagi Ahad.

Bagaimanapun keputusan mengenai langkah penyelesaian terhadap krisis tersebut dijangka akan diumumkan menerusi sidang media khas di Kuala Lumpur pada Isnin.

"Kita memang sudah ada keputusan. Kita akan umumkan dalam masa terdekat.

"Kalau ikutkan, esoklah mungkin masa terdekat itu, tapi kita akan maklumkan perkembangannya kemudian. Sidang media akan diadakan di Kuala Lumpur," katanya kepada mStar Online di sini, Ahad.

Mesyuarat khas Jawatankuasa PAS Pusat yang diadakan di Alor Setar dipengerusikan sendiri oleh Presiden PAS, Datuk Seri Abdul Hadi Awang.

Sementara itu Timbalan Presiden PAS, Mohamd Sabu ketika dihubungi berkata, beliau yakin keputusan yang bakal diumumkan nanti dapat menyelesaikan semua pertikaian yang berlaku.

Menurut Mohamad, PAS Pusat sudah meneliti dengan sebaik mungkin setiap penjelasan yang diberikan Menteri Besar Kedah, Datuk Seri Azizan Abdul Razak dan Timbalan Pesuruhjaya I PAS Kedah, Datuk Phahrolrazi Zawawi.

"Insyallah keputusan yang kita buat itu akan diterima sebaik mungkin oleh semua pihak.

"Harap semua pihak termasuk media bersabar, kita tak akan buat sidang media di Alor Setar," katanya.

Krisis kepimpinan di Kedah berlanjutan selepas dua exconya termasuk Phahrolrazi dan Timbalan Pesuruhjaya II, Datuk Ismail Salleh menolak pelantikan semula jawatan, tetapi meletakkan syarat sekiranya mahu mereka menerima semula tawaran itu.

Hakcipta Terpelihara © 1995-2012 Star Publications (Malaysia) Bhd
Source:

http://mstar.com.my/berita/cerita.asp?file=/2012/3/4/mstar_berita/20120304110426&sec=mstar_berita